



Minggu, 26 Desember 2021
Ogen: Efesus 4:20-24



Pakelah Manusia Si Mbaru



Ngerana kerna manusia si mbaru ertina ngerana kerna perubahren i bas si male nari. Perubahren i bas kerina sisi kegeluhen; perubahren kula, perubahren perukuren ras perubahren perbahanen. Perubahren kula umpamana reh belinna, reh jilena, reh bersihna ras sidebanna. Perubahren perukuren, adi nai lalap ngenehen kekurangan teman enda erlajar ndarami kiniulinna, adi mbarenda murah kelsehen, gundari lalap semangat, adi mbarenda rusur megelut gundari murah ngalemi. Perubahren perbahanen umpamana, nai mediker gundari melumbar, adi nai mekisat erdahin, gundari tutus dingan megenggeng i bas erdahin, adi nai lalan ngerana asangkan erdahin genduari dahikenna dahin alu ertanggungjawab ras lanai melala ngeranai.

Terdauhen, manusia si mbaru e me manusia si pengarapenna man Kritus Jesus. Manusia si nadingken kinitekenna si ndekah. Perpulungen Efesus ope denga turah i je Kata Dibata, perpulungen e nembah man patung-patung ras man dewa-dewa bahanen-bahanen manusia. Tapi kenca itandaina Kristus, ialokenna jadi Juru Selamatna, tadingkenna kerina si ndekah, ikernepkenna kerina patung-patungna, si labo erkuasa nandangi kegeluhenna. Tupung nembah man patung-patung, la datna pengajaren moral umpamana la banci erbual, ngataken kata si la tuhu nandangi teman, la banci nokoh ras nindes kalak musil ras sidebanna. Tapi kenca ibegina pengajaren Kristus si mabai ia ngerana kerna kebujuhen, keadilan ras moral si mehuli jadi perubahren i bas dirina, ngerana kerna kata tuhu, erkesehen, metemue, nggit ngukuri kiniulin jelma si enterem ras sidebanna.

Adi aloken Jesus e tubuh i bas pusuh, mahan bana melala perubahren i bas diri ku si mehuli sabap Jesus e bapa si mehuli. La lit si jahat i bas ia. La lit si la mehuli.